

光緒睢甯縣志彙卷第十八

雜錄志

夫義易終存雜卦子書不廢雜家經外雜鈔魏了翁之瑣錄也白田雜著王懋竝之遺編也睢地封疆向廣掌故恆多而如后宗支未能別分部類名流筆記礙難附綴簡篇卽茲亥豕魯魚亦資攷證雖屬齊諧里藥足廣見聞爰隨筆而臚列焉亦鏡古者之助也作雜錄志

辨訛二則

史記王子侯年表睢陵江都易王子元朔元年正月丁卯侯劉定國元鼎五年坐酎金失侯而漢書表作淮陵攷地理志臨淮

光緒睢甯縣志彙

卷十八

雜錄志

郡縣二十九有睢陵又有淮陵漢書易王非傳中亦作淮陵侯

定國

按今漢書定國爲淮陽侯

而史記不載惟史記小字索隱曰表在淮陵

謂漢書表也今漢書表下注淮陵二大字而又無凡例可攷不知史記本作淮陵而刻書誤作睢陵抑史記原本睢陵而漢書改作淮陵耶地僻書少無從攷據若如史記所書則睢陵之爲封邑不始於晉之王元公也

漢書百官表元鼎四年睢陵侯張廣國爲太常太初元年睢陵侯張昌爲太常坐乏嗣論攷列侯年表宣平侯張敖以高祖九年封十七年薨高后二年侯偃爲魯王孝文元年復爲侯十五年薨侯歐嗣十七年薨侯生嗣十四年有罪免元光三年侯廣

國以生弟紹封睢陵侯元鼎二年侯昌嗣爲太常乏嗣免而史記則作睢陽侯廣攷史記睢陵侯劉定國於元鼎五年失侯而漢書睢陵侯張廣國於元鼎四年方爲太常不應同治有二睢陵侯也蓋史記於劉定國本作睢陵故於張廣國注曰睢陽漢書於張廣國本作睢陵故於劉定國別曰淮陵卽一睢陵之封而史記漢書不同如此千百年後更何所攷信也

邑人朱之承管蠡集

按漢書張耳傳元光中封張廣國

張耳元孫爲睢陵侯薨子昌嗣

太初中國除元光中睢陵旣封張廣國則元鼎元年不當復封劉定國矣漢書王子侯表以定國爲淮陵侯文獻通攷亦如之卽史記索隱亦曰表在淮陵則劉定國爲淮陵侯張廣國爲睢陵侯確然無疑史記建元以來王子侯表睢陵屬定國誤也

趙皇后

孝穆趙皇后諱安宗下邳僮人也祖彪字世範治書侍御史父裔字彥胄平原太守后以晉穆帝升平四年嬪孝皇晉哀帝興甯元年四月二日生高祖其日后以產疾殂於丹徒官舍時年二十一葬晉陵丹徒縣東鄉練壁里雩山宋初追崇號諡陵曰興甯永初二年有司奏曰大孝之德盛於榮親一人有慶光被萬國是以靈文寵於西京壽張顯於隆漢故平原太守趙裔故洮陽令蕭卓並外屬尊戚不逮休寵臣等仰述聖思遠稽舊章

並可追贈光祿大夫加金章紫綬命婦孫可豫章郡建昌縣君
卓命婦可吳郡壽昌縣君孫氏東莞人也其年又詔曰推恩之
禮在情所同故內樹宗子外崇后屬爰自漢魏咸遵斯典外祖
趙光祿蕭光祿名器雖隆茅土未建並宜追封開國縣侯食邑
五百戶於是追封裔臨賀縣侯裔長子宣之仕至江乘令蚤卒
無子以弟孫襲之繼宣之紹封襲之卒子祖憐嗣齊受禪國除
宣之弟倫之自有傳

宋書后
如列傳

趙倫之

趙倫之字幼成下邳僮人宋武穆皇后弟也少孤貧事母孝初
隨武帝以功封閬中縣五等侯遷雍州刺史武帝北伐倫之遣

光緒睢寧縣志彙

卷十八

雜錄志

三

順陽太守傅宏之扶風太守沈田子出嶧柳大破姚泓於藍田
武帝受禪以佐命功封霄城縣侯安北將軍鎮襄陽景平初徵
拜護軍將軍元嘉三年拜鎮軍將軍遷左光祿大夫領軍將軍
倫之性野拙人情世事多未諳居方伯久頗富盛入爲護軍資
力不稱以爲見貶光祿大夫范泰嘗戲謂曰司徒公缺必用汝
老奴我不謂汝資地要是外戚高秩次第所至耳倫之大喜然
雖外戚貴盛而能以儉素自守

宋書本傳按潼宋時
屬下邳今屬睢寧

趙伯符倫之子字潤遠襲父爵爲侯少嗜弓馬倫之之鎮襄陽
也伯符爲竟陵太守時竟陵蠻屢爲寇伯符悉討破之由是已
有將帥之稱後爲宵遠將軍總領義徒以居宮城北每聞警輒

躬擐甲胄助郡縣赴討武帝甚嘉之元嘉初累遷徐兗刺史爲政苛暴吏人畏之如豺虎然而盜寇遠竄亦無敢犯其境者十八年徵爲領軍將軍進護軍將軍復爲丹陽尹在郡嚴酷吏人苦之子倩尙文帝第四女海鹽公主卒諡曰肅

宋書本傳

陳伯之

陳伯之梁濟陰睢陵人少多力嘗佩刺刀偷刈鄉里稻田主見之反避去及長在鍾離數爲劫盜鄉人齊車騎將軍王廣之愛其勇征伐嘗自隨以斬安陸王子敬又頻有戰功仕齊爲冠軍將軍驃騎司馬封魚復縣伯假節督前驅諸軍豫州刺史將軍如故梁興舉江州降進號鎮南將軍力戰有功復進號征南將

光緒睢寧縣志

卷十八

雜錄志

四

軍封豐城縣公邑二千戶遣還之鎮伯之不識書得文牒辭訟惟作大諾而已尋復叛敗奔魏魏以爲使持節散騎常侍都督淮南諸軍事平南將軍光祿大夫曲江縣侯梁天監四年得梁邱遲書復歸於梁書略曰陳將軍足下無恙幸甚將軍勇冠三軍才爲世出棄燕雀之小志慕鴻鵠之高翔昔因機變化遭逢明主立功立事開國承家朱輪華轂擁旄萬里何其壯也如何一旦爲奔亡之虜聞鳴鏑而股戰對穹廬以屈膝又何劣耶夫以慕容超之強身送東市姚泓之盛面縛西都故知霜露所均不育異類姬漢舊邦無取雜種北虜僭盜中原多歷年所惡積禍盈理至焦爛况僞孽昏狡自相夷戮部落攜離酋豪猜貳方

將繫頸蠻邸懸首藁街而將軍魚游於沸鼎之中燕巢於飛幕之上不亦惑乎莫春三月江南草長雜花生樹羣鶯亂飛見故國之旗鼓感生平於疇昔撫弦登陣豈不愴恨所以廉公之思趙將吳子之泣西河人之情也將軍獨無情哉既至以為使持節都督西豫州諸軍事平北將軍西豫州刺史永新縣侯復以為通直散騎常侍驍騎將軍

梁書本傳按魏書田益宗傳陳伯之下邳人也魏時下邳統睢陵

陳虎牙梁陳伯之子始仕梁為直閣將軍伯之降魏用為質魏以為冠軍將軍豫甯縣開國伯遷前軍將軍

魏書田益宗傳並梁書陳伯之傳

柴王轍迹

周世宗未遇時曾於子仙集上推車販繖至今轍迹猶有能道

光緒睢甯縣志

卷十八

雜錄志

五

其地者

舊志

捕蝗者說

癸未夏麥將登淮西蝗大作睢水北劇所過蠶食無子遺余憂焉因檄下鄉民大捕之民初疑貳弗克奔命余強之旬日間捕獲殆盡其害遂平余公暇因進百姓訊所以始難之故僉曰蝗之為害亦渺小哉曷捕為我睢有一種異蟲餓如猛虎貪如毒狼每歲噬人無厭俾人人自危其禍視蝗烈且慘也舍此不捕而惟蝗是急是猶縱豺狼而問狐狸也民何以安余聞之驚駭移時因詢厥狀僉曰人面獸心鷹爪蠓足虎翼狐尾其口如密其腹似劍其形似鬼其膽如天蓋兼眾醜而有之人望之方將

影響之弗幽也可畏哉余曰願聞其名僉曰渠之橫暴不一其稱名亦異自其潛蹤城窟善搏雞犬則名曰城狐蟲自其影身廢社慣饕雜糧則名曰社鼠蟲自其偷竊田土咀嚼酒食則名曰喫地蟲自其局騙子女剗心割肉則名曰喫人蟲自其身生巖穴足占公門則名曰出頭蟲自其甜處求食苦中求避則名曰兩頭蟲自其侵漁夏麥餽口秋糧則名曰蠹國蟲自其鑽毀房屋穿離墳墓則名曰殃民蟲害之所在而名因之其名亦可畏哉余曰噫嘻有是哉其害比蝗孰大僉曰惡惡何言蓋蝗之害止於一方而蟲之害及天下蝗之害止於一時而蟲則害及萬世蝗之害止於田禾而蟲則害及骨髓蝗也烏敢與蟲爭衡

蟲為誰曰積年棍里長也僉為誰曰被害苦甲首也捕者誰曰

睢甯縣知縣也舊志載知縣申其學撰

方靈圓

方靈圓明季諸生因世亂為道士住找溝玉皇廟晚遇呂純陽得道歸華山其徒思之訪於西岳見之石室中相聚月餘贈寶劍念珠茶壺等物偶歸息道旁樹下羣兒聚觀見螻蛄數百飛鳴繞其旁靈圓接以手噓而吐之咸以為異及起行視所吐皆荔枝壳也鄉里爭延致如期往一日數處同見之始知為仙

純廟南巡封普利真人有碑記可攷舊志稱池山水繞是也

繩鞭王氏

光緒睢甯縣志彙

卷十八

雜錄志

王氏在明末時有三勇士嘉鳳嘉鳴嘉爵兄弟也俱習武藝而尤精熟於繩鞭其鞭穗重十餘斤人莫敢當寇起鄉人以練長相推崇禎九年寇至勇士率鄉團保衛一方免流離旋有小袁營眾數萬駐找溝集蹂躪萬狀而南境安定如故勇士堵禦之力居多相傳總兵劉良佐破賊時曾親試其繩鞭有青黃黑旗甲之賜名亦顯著矣惜其軍功武職多湮沒不傳

邑人李心宅雜記

還魂張

還魂張自言已三還魂矣原姓張故以為號還魂張云睢甯一農夫死數日矣張魂忽伏尸而起農素不知書忽能操文墨講道術法遠邇驚異從游者日眾其教率勸人修善以勤苦為先

或道路橋梁宜修者躬負土率弟子從事不日可成縣西北有
路如大隄傳爲還魂張所修云所著道書云有人心若似獸心
成佛不難獸心若似人心永不得人身之句語甚奇特至今江
淮間尤傳其書迨老卽委形去又復還魂大抵奪舍法云

邑人王應

中氣菴
擊音

石屋僧

石屋僧者見里中諸生王台輔大集親朋哭祭先帝而後就緇
僧適過之手持一麻鞭指之曰此亦常事也惡用是矜張爲後
數月有人渡河來者曰石屋一僧以雉經死有麻鞭在其側僧
名不可知以其死於石屋而遂名之曰石屋僧

南疆
逸史

光緒睢寧縣志彙

卷十八

雜錄志

八

劉公甘泉記

睢陵地瀉鹵鑿井而食率皆苦水求甘泉不易得也康熙丁酉
令君劉公修城工及半戊戌續修正在鳩工天久不雨時亟需
甑陶人非水不能搏埴兼甑歇火待水潤幾束手矣令君命於
窰前掘井未及丈水湧出陶人以供和坯每一窰甑熟汲水百
桶潤之四窰具舉泉弗竭眾稱異矣以爲天助城工之成也顧
陶人與諸傭不能言水味眾取嘗之乃知此井最甘尤異之夫
古拜井得水又如馬跑名泉傳之自昔以爲異事其視此井何
如人皆謂爲城井以事名也又謂爲劉公井以人名也邑附城
諸泉水味甘者舊數城東南紅土地廟井味同此井之甘勢不

若此井之盛，次數城西北王家堂井，然味與勢兩不如。又城東南玉皇閣前井，水亦云甘，今則味變。是諸泉惟此獨勝矣。令君操守絕人，卽節衣縮食之餘，皆出以辦公事。莅睢五載，愛護士類，未嘗斥辱一人。清風任力，和氣兼而有之。泉之質清氣盛，味甘實，相感應，正不獨助城工矣。貽出令君本房來主睢義學，聞邑人之述此泉，若此次第其語而記之。

舊志載溧陽舉人宋貽撰

蒙山關王

治南玉皇閣供關帝像，康熙年間東省大水順流浮來者也。光緒元年裝金，中有黃布載明洪武四年蒙山古關王廟攷蒙陰距睢甯三百餘里，聖像浮來，則爾時洪水滔天，人民昏墊被害之慘，不可勝言矣。

光緒睢甯縣志

卷十八

雜錄志

九

楊恢基

楊恢基字石樵，山西人。官睢甯令，山水花卉學石田氏所居，有融心齋。與蔣深孫綠同爲畫友。張庚國朝畫徵錄按畫徵錄創始於康熙六十年，脫稟於雍正十三年。庚以恢基爲亡友，則定爲康熙時人。睢署檔冊未載，不便列於職官。惟繪畫成家，知非俗吏，附記於此以存其名。

錢縣丞

睢甯縣丞錢某，權知縣事。其地向例有路斃者，相驗時地主出錢八千送官，便可結案。一日某村來報有投河死者，吏以前例告錢，錢往驗屍，無傷命，卽掩埋回公館。後吏送進地，主常例八千錢將受矣。見錢用紅繩穿繫，色尙鮮華，不解其故，以問吏。吏

曰地主家貧無力出此不得已將一女賣與村鄰爲妾得價二十四千因係喜錢故用紅繩耳錢思此錢係逼迫而來不忍濫受卽召村人詰之具以實告乃並召其買妾者曉之曰我得人錢而迫之賣女不仁也汝乘其急而買其女不義也我決不受此錢汝速退歸此女其人唯唯因問賣女者曰餘錢尙存否曰都作衙門胥役使用矣錢命胥役追繳則已彼此飲博將錢分散錢慨然願買女者曰吾償爾錢卽命給發原數令村人領女歸家此案遂結無何錢患背疽昏迷於牀夢青衣人召至一處殿宇巍峩上坐王者謂錢曰汝大數已盡幸有一善事足以抵償汝知之乎錢茫然不解王者令判官查簿與觀則所載某年

保全賣女一事也判官奏曰此事功德甚大例得延年一紀官至五品王首肯之遂令青衣人送其還魂疽遂愈錢自此一心行善袁枚續新齋譚按睢邑縣丞國朝專管河務駐姚家集而檢閱職官表並無錢縣丞權知縣事或者檔冊不全書缺有間耳姑存焉以爲行善者勸

白龍祭母

乾隆某年治南陳氏女雨水盥手忽心動數月臨蓐初生時如紅絲蠕動須臾如拇指出門則鱗角宛然一白龍乘雲去三日來索乳母驚而死家人斂葬諸野忽雷雨交作羣見一龍繞墓上哀聞數里雨霽見爪痕徧地巍然一大冢也嗣是每歲必來損稼禾里人禱爲祭掃自是白龍不來

卓觀
宸采

官署鎮物

睢南管河同知署在睢穹之清晏集

即慶安集

署中有妖異廳中一

廁屋壁掛草帽一馬鞭一不知始自何時有北人來官此者不之信試去之其夜內外燈火滅更夫多迷罔鑼與鼓皆無聲諸友力勸官為易以新者仍未靖且有兵馬聲自屋上窗外過如此數日雞犬不安因仍用舊帽及鞭懸原處始寂然帽也鞭也曷靈應乃爾也或始設者有以鎮之也

齊學表見聞隨筆載

李集火光

咸豐五年二月初四日夜紅受各星見火光自西南來大者如秉炬小者如篝燈一望無際時蒙亭盜起人心驚惶次日彼此

光緒睢甯縣志彙

卷十八

雜錄志

二

尋問東西百餘里所見略同而實未有賊此蕭縣志所載也是夕大李集以南所見亦然李心宅記以詩云疑寇兼疑鬼火光萬里紅然明荒野外吐燄亂林中閃閃遙連邇行行北忽東鄉

愚傳警急嚇殺一衰翁

小周村一老者因驚而死

李集鼠徙

大李集被燒前三日鼠相率東徙官路溝蹄迹殆遍與蕭縣志所載若合符節物能前知理固然也

狐避貢生

王家林圩有狐居某氏家圩戶老幼數千人狐皆以小字呼之王光斗年八十餘狐稱老貢生而不名或笑其不能前知狐曰

王君正氣有道我不敢近光斗至家狐遂避去
同治元年事
卓觀儀采

光緒睢寧縣志彙

卷十八 雜錄志

睢甯縣初志纂修姓氏 萬曆十四年初修

總裁申其學 知縣山東日照縣人

纂修黃廷敷 教諭廣東 縣人

劉爾壯 訓導 紀思宦 主簿 周 翥 邑人 全 梓 邑人

校閱 李思莊 縣丞 胡文習 典史 邱九仞 邑人

光緒睢甯縣志纂

舊志纂修姓氏

睢甯縣高志纂修姓氏 崇禎十五年再修

總裁高岐鳳 知縣陝西 涼州人 纂輯 胡至貞 教諭南直 徽州人

周繩武 龍南 劉永慶 浮山 周明遠 貢生 魏夢熊 廩監

參閱 胡效猷 高郵 王應中 舉人 全振奇 貢生 王明元 邑人

劉大受 胡系虞 周世璽 全惟寅 魏應元

孫國楨 魏夢暘 張虎文 以上 周應林

督刊朱世隆 史典 郭之屏 朱凌雲 廩增 全鼎新

全存奇 朱廷獻 孫雲祜 附生 胡騰鯉

王應坤 王任久 李明輔 以上俱 邑耆民

睢甯縣石志纂修姓氏 康熙六年三修

總裁石之玫 知縣陝西甘泉縣人

孫大經 教諭江南上海縣人

編纂 徐常 訓導江南武進縣人

邱園卜 李枝翹 馬斯藏

協修 王應中 魏夢暘 以上俱邑人

光緒睢甯縣志彙 舊志纂修姓氏

二

康熙二十二年癸亥奉部通行郡邑纂修志書送部為一統志底本睢甯是年奉行纂修其時知縣葛之莫因奉催嚴緊僅增序文即用石志原板猶未修也其列志前者

總裁葛之莫 知縣遼東人

陳哲 教諭廣德州人

張聯斗 訓導壽州人

陳乾元 邱園蓬

金雲鼎 李沃 以上貢生

王德重 王肅 劉肩雲

李敦良 王肅 邱雲登 以上監生

睢甯縣劉志纂修姓氏 康熙五十七年五修

總裁劉如晏 知縣廣西臨桂人

費廷宣 教諭江南長洲縣人

郭蕃 縣丞順天宛平縣人

校閱 沈紹藩 訓導江南常熟縣人

趙煇 主簿奉天鑲藍旗人

編纂李杰 貢生

周特 拔貢 劉朝觀 監生 邱崑 生員

參訂 李克纘 監生 王承謨 監生 以上俱邑人

魯嗣淵 典史浙江紹興縣人 魏璽 耆民邑人

督刊 魏奮翼 生員

以上俱舊志

光緒睢甯縣志

舊志纂修姓氏

三

